

11
DISSERTATIO INAUGVRALIS MEDICA
DE

FEBRE ERYSIPE- LACEA

QVAM
PROPITIO SVMMO NVMINE
PRÆSIDE

PRO-RECTORE ACADEMIÆ MAGNIFICO

ON. FRIDERICO HOFFMANNO

FACVLTATIS MEDICÆ SENIORE ET h. t. DECANO

Ad d. Martii Anni MDCCXXIX.

H. L. Q. C.

PRO DOCTORIS GRADV

RITE OBTINENDO

PVBlico EXAMINI SISTET

FRANZ LVDWIG DIETRICH

BIELICENSIS - SILESIVS.

HALAE MAGDEBVRGICAE,

Typis JOH. CHRISTIANI HILLIGERI, Acad. Typogr.

ILLVSTRISSIMO ATQVE EXCELLENTISSI-
MO DOMINO,

D O M I N O

HENRICO

WILHELMO

S. R. I. COMITI

DE SOLMS ET TECKLENBURG

DYNASTAE

IN WILDENFELD ET BIELIZ

D O M I N O

MÜNZENBERGAE ET SONNENWALDAE

SACRAE CAESAREAE MAJESTATIS

CAMERARIO &c. &c.

DOMINO SVO GRATIOSISSIMO

DISSERTATIONEM HANC INAUGURALEM
IN SVBMISSAE DEVOTIONIS
TESTIMONIUM

DICAT

AC CVM VOTO

PERENNIS FELICITATIS

ET

INCONCVSSAE SANITATIS

DEDICAT

DEVOTISSIMVS CLIENS

FRANZ LUDWIG DIETRICH,

BIELICENSIS SILESIVS.



DISSERTATIO INAUGURALIS MEDICA.
DE
FEBRE ERYSIPE-
LACEA.

PROOEMIUM.



Ngens quidem morbo-
rum numerus, quibuscum morta-
les subinde affliguntur tandemque
penitus e medio tolluntur. Sed nul-
lum ex his genus majoris, ob gra-
vitatem & frequentiam, in Medi-
cina momenti, quam febris & in-
flammatio. Pandemius est uterque hic morbus, a quo
nulla gens, nulla ætas, natura nulla, sexus nullus im-
munis, sed omnes omnino patent ex æquo, tam sæpe &
tam

tam crebro, ut, si calculum recte ponamus, vix decimus agrotorum, alia, quam febrili, aut inflammatoria, detineatur passione. Gravem autem etiam esse utrumque, nemo sane ignorat, qui quantopere in iis tota motuum vitalium œconomia turbetur ac lædatur, ex ipsis quibus stipantur symptomatibus, tenet perspectum. Formalis quippe febris ratio in eo consistit, ut universum nervosarum partium genus spasmis exagitet vehementer, nec eapropter ulla in corpore pars sit, quæ sub impetu suo secundum naturam munere rite fungatur, ipsa mens haud raro turbetur, quin, nisi remittant iterum infestæ stricturnæ, vita ipsa opprimatur. In inflammatione autem, ille alicubi subsistens humor impactus, non modo vitalem succorum progressum graviter turbat, æstum & calorem in universo corpore accendit, sed & in parte cui insidet, ardorem & dolorem suscitatur exquisitum, ac nisi cito discutiatur, corruptionem inducit, modo citius, modo lentius vitæ ipsi insidiantem. Interim tamen uterque hic morbus non semper una eademque infestat vehementia, nec periculo semper eodem; sed febris pro maiori, vel minori causæ virulentia, jam mitior est, jam gravior; & inflammatio, prout partes magis, vel minus nobiles ac sentientes infestat, cum minore etiam, vel maiore periculo complicatur. Hinc ubi interius obhærescit materia aeris, deleteria & inflammans, febrem accendit acrem & haud leve vitæ intentat periculum. Sed ubi hæc critico quodam motu ad externas minus nobiles partes amandatur, remittit impetus & morbus tandem etiam discedit, nisi forte ob intervenientes alias causas eventus procuretur minus auspiciatus. Patet id uberius febrium exanthematicarum exemplo, quæ magna cum

vehementia adoriuntur; ubi tamen facta in cute efflorescentia, deservescunt. Sed quando retinetur materia intus, aut egressa relabitur, internis vitæ proxime servantibus partibus inflammationem inducit, cum vitæ ut plurimum iactura. Atque ex harum censu etiam est illa febris, quam sequitur inflammatio erysipelacea. Frequens certe & gravis morbus, sed qui plerumque vel domesticis experimentis relinquitur, vel negligentius ab ipsis medentibus excipitur. Ex quo quam gravia in laborantes resultent incommoda, pluribus experientia quotidiana facit testatum. Mihi autem digna omnino est visa hæc *erysipelacea febris*, quæ penitus excuteretur & de qua recta medendi methodus suppeditaretur. Sumsi igitur hoc mihi ad ductum *Magnif. Dn. PRAESIDIS* iam speciminis inauguralis loco perficiendum, & summum Numen supplex rogo, velit coepto favere labori,

§. I.

Erysipelatis vox, origine Græca, vel à colore rubro, vel quod ad vicinas serpat, derivata, apud prisca quidem latius sumpta videtur, pro quavis inflammatione. Hodie autem in scholis Medicorum stricte & proprie denotat illum affectum, quem Latini dicunt, a colore roseo, rosam, nec non ob ardorem impensum, ignem sacrum, nostri die *Rose, das Rothlauf, das wilde Feuer*. Vt vero, quid nos per erysipelaceam febrem intelligamus, statim in limine pateat, dicimus: esse febrem exanthematicam, in qua sub intensiori sanguinis & humorum motu, serum acre, sulphureæ, causticæ naturæ, ad partes extremas, cum tumore, rubore, ardore & dolore, propellitur.

§. II.

§. II.

Febrem igitur , & quidem exanthematicam , esse , erysipelaceam , asserimus , idque etiam omnia , quibus stipatur symptomata , uberius evincunt. Nimirum præcedit lassitudo in toto corpore , succedit horror , cum præcordiorum anxietate , vigilia , dorsi capitisque dolore , excipit æstus , pulsus contractus & frequens est , alvus stricta , urina rufa sine sedimento , aliquando accedit vomitus biliosus , aliquando delirium , in glandulis colli , axillarum , vel inguinum dolor aliquis sentitur ac tumor , & inde sensim stria rubea secundum rectum ductum versus inferiora elongatur , donec intra tertium ut plurimum & quartum diem , partem aliquam , frequentissime in cruribus , aliquando in capite , genis , facie , mammis , aut brachio , dolor corripit pungens & pulsans , cum calore , ardore , tumore superficiali & rubore , florido instar rosæ , plus minusve expanso , qui ex compressione disparet , eademque remissa , mox redit. Postea febris cum gravioribus symptomatibus conquiescit , pulsus fit mollior , somnus redit , mador prodit , urina sedimentum ponit , dolor cum ardore sensim mitescit , rubedo etiam , aliquandiu adhuc perseverans flavescit , pallescit ac demum cum pruritu evanescit , atque interdum cuticula vel sponte , vel ob frictionem finditur , vel fissa furfurum instar abscedit & abraditur. Sed quando minor ardor & rubor , tumor autem magis expansus , efflorescunt quandoque vesicæ subalbidæ , e quibus serosus humor , tandem saniosus & pus , effluit , atque discusso erysipelate , tumescentia remanet œdematosa. Quandoque etiam pustulæ , quandoque vesicæ majores , prodeunt , aliquando in ambitu lividæ , vel etiam nigricantes , e quibus
ruptis

ruptis sanies promanat, & suscitatur exulcerationem, facile in gangrænam transeuntem.

§. III.

Sic incedit atque decurrit erysipelacea febris. Omnia autem, quæ in ipsa præsto sunt pathemata, & gravia, & multa, confirmant utique, non tam levem & innocentem esse morbum, ac vulgo creditur, sed gravem sæpe atque periculosum, quin eundem multum affinitatis alere, cum morbo omnium atrocissimo, ipsa febre pestilentiali. Nam invadit fere hoc malum uti pestilentia, ut qui hanc experti, illius autem insultui minus assueti, existiment, se lue pestifera corripui, donec tandem in cute compareat inflammatio erysipelacea, morbiq; genium apertius prodatur. Vti deinceps materia pestilentialis sedem læpius figit in glandulis inguinalibus, axillaribus & parotidibus; ita eadem observantur in erysipelate, quod ubi capiti imminet, patiuntur primum parotides, si mammis, axillares, si pedibus, inguinales. Pestifera præterea materia in glandulis abscessus format, ac partibus extremis facile gangrænam & sphacelum inducit; sacrum autem ignem axillares præsertim & mammarias glandulas sic sæpe adurere, ut pus contrahant & artus quoque foeda corruptione afficere, omnes qui medicinam faciunt uberius norunt. Demum sicuti in peste nil periculosius, quam si materia expulsa ab externis, ad interiora relabitur: sic eadem noxa idemque periculum a retrocessione erysipelatis metuentum.

§. IV.

In eo tamen erysipelacea a pestilentiali febre differt, quod non ex contagio, sine causa externa, sed interna oriatur, nec contagiosa sit & alios sola exhalatione inficiat,

ficiat, nec tam virulenta sit & cum mortis periculo juncta. Inflammatio autem erysipelacea, ab aliis, his distinguitur, quod tumor in illa depressior, dolor non tam tensivus, color quoque roseus & floridus, qui in his magis fuscus. Neque minus a phlegmone discernendum erysipelas. Nam in hoc inflammatio magis superficialis, in latum diffusa & pressa colorem exuit, materia quoque pauca & tenuis, in illo autem profundior inflammatio, subjectam non modo cutem, sed & pinguedinem & musculos tangens, attactu, ob duritiem, colorem non deponens, ac fit a stagnante impuro sanguine, propterea facilis in gangrænam est transitus.

§. V.

Ipsam autem erysipelas a Practicis vulgo distinguitur in verum, quod & simplex, ac in nothum, quod & scorbuticum, vocant. Simplex facilius obsecundat commodis remediis internis & externis, ac tantum in superficie cutis hæret; nothum autem magis est chronicum, ob succorum impuritatem altius radices agit, difficile curatu & facile abit in ulcera mali moris. Subdividunt hoc igitur iterum in illud, quod cum, & quod sine exulceratione est. In exulcerato plus utique periculi metuendum, & ægris & Medicis, & per longum sæpe tempus detinet, difficulter consolidandum.

§. VI.

Porro erysipelacea febris quandoque idiopathica, siue morbus primarius, quandoque symptomatice & morbus secundarius. In anasarca quippe, ascite, item diuturno ictero, flavo & nigro, accedit haud raro symptomatice erysipelas & ægrum jugulat. Sæpe etiam complicatur vulneribus partium nervosarum, præsertim cranii
ejus-

ejusque membranarum, item fracturis ossium, ac tum quoque in ancipiti versatur æger.

§. VII.

Tum non in omnibus semper unius ejusdemque indolis est erysipelas ac vehementiæ. Etenim, in quibusdam, juvenibus maxime, nec materia adeo virulenta, nec adeo multa, levius facit ac benignius, quod neque glandulas occupat, neque febrem intensam movet, sed secundo mox die prodit, cum rubore, tumore ac dolore in pedibus, & sub perspiratione debita, vel leni remedio domestico, promte discutitur. Contra ea in cacochymicis, senibus & impuris corporibus, ubi materia, & copiosior, & deterior, systema nervorum & vasorum gravius exagitatur, febris est acrior, dolores & inquietudines acerbiores, ac nisi exquisita medicatione excipiat, diu affligit & ægrius cedit.

§. IIX.

Differt quoque erysipelas ratione partium quibus incumbit, & variis distinctis stipatur symptomatibus. In pedibus nitorem inducit tibiis, quin, si gravius, cum dolore ad crura usque propagatur & levi attactu exacerbatur. Faciem si occupat, intumescit hæc successive, rufescit, interspersis copiosis aqueis vesiculis, oculi a tumore clauduntur, spiritus difficulter trahitur, nares & fauces aridæ valde sunt & siccæ, & torpor plerumque ac sopor conjunctus est, quin, ob propinquitatem cerebri, metuendum, ne in phrenitidem, vel lethargum degeneret lethalem. Mammas ubi erysipelas tangit, intumescunt, indurescunt, sæpe lapidis instar, cum exquisito dolore & facile sequitur suppuratio. Sub axillis ibique positæ glandulæ acerbissimo stipatur dolore & plerum-

que in abscessum defint. Umbilicalem regionem in infantibus, frequentius infestat, ac inde per abdomen spargitur, cum gravibus pathematibus, funesto utplurimum eventu.

§. IX.

Ex peculiaribus erysipelatis generibus est illud, quod gravioribus symptomatibus prodit, modo supra, modo infra umbilicum, & medium corpus, ab anteriori facie ad posticam & spinam usque, utplurimum latitudine aliquot digitorum transversorum, cinguli instar ambit, cum intensissimo ardore & insidentibus pustulis acribus, ignis in modum urentibus. Paucis hoc nostro tempore cognitum, & a Veteribus quoque parum notatum. Meminit ejusdem PLINIVS *lib. XXVI. cap. XI.* sub nomine Zoster, & SCRIBONIVS LARGVS *de comp. medic. cap. XCIIX.* vocat Zonam. Vidit illud haud ita pridem *Magnif. D. PRAESES* in viro celeberrimo literato, purpuræ scorbuticæ admodum obnoxio, hac aliquandiu retenta, idque interne temperatis diaphoreticis, & exterius in fine litu olei ovorum, intra quatuordecim dies, feliciter persanavit. Alias omnino periculosum, & tradit jam PLINIVS, quod hominem necet. Quam periculosum etiam sit binis exemplis confirmat. 30. *LANGIVS epist. pag. 110.* uno Marchionis Georgii in Onelspachio, qui eodem ex ulcere cruris a Chirurgo intempestive consolidato interiit; altero Comitissæ Palatini Otthenrici, qui a lumbis ad genua usque hoc exanthemate circumdatus, febre simul ad delirium usque æstuans, incisa tamen utriusque pedis venâ & adhibitis quæ febrem restinguerent, a morte adhuc vindicatus. Neque minus idem cum hoc esse videtur affectus, quem

TVLPIVS *observat. medicinal. lib. III. cap. XLIV.* sub nomine exedentis præcordiorum herpetis describit.

§. X.

Omniū verò , ut ita dicam , malignissimum est, quod post magnum viriū languorem in corporibus senilibus, eminentius cacochoymicis, erumpit, subito late diffunditur, livescit, nigrescit & necat. Observavit id quondam *Magnif. Dn. PRÆSES* in consiliario septuagenario, cujus femur totum occupavit inflammatio erysipelacea, cum febre acuta & affectu soporoso, in quo altero mox die color in fuscum conversus & quinto die mors accessit. Ejusdem deleteriæ indolis & illud est, quod nonnunquam in febribus malignis & pestilentialibus, sub papilla & in cordis regione, vel etiam manibus aliisque exquisitioris sensus partibus, efflorescit, lividum mox fit, demum atrum, morte cito subsequente. Quod & PLATERVS sapius annotavit ac *opp. tom. II. pag. 23.* sub nomine maculæ latæ descripsit & quale etiam se vidisse testantur collectores *Histor. morb. Vratislaviens. anno MDCXCIX. pag. 7.*

§. XI.

Ad causas hujus febris quod attinet, materialis ne-
tquam simplicis biliosæ, vel falsæ, sed potius causticæ,
acris & putrefacientis indolis esse videtur. Vehemens
enim ipsius in partes nervosas operatio, totius corporis
œconomiam functionum illico graviter turbans & vigili-
am, delirium, inquietudinem, anxietatem, corporis
jectigationem, vomitum & sensuum turbationem, indu-
cens. Longe gravior adhuc, quando expulsa materia
retrocedit, quippe quæ, tum haud secus, ac venenum,
cito deliria, inflammationem internam, asthma convul-

sivum & spasticas strictureas ciet, sæpe lethales. Ne dicam, gangrænam & sphacelum, quæ erysipelas, inprimis male tractatum, facile excipiunt, virulentiam materiæ luculenter satis prodere ac indicare. Unde vero hæc materia trahat ortum? non adeo quidem in expedito. Ego tamen crediderim, ex bile, variis ex causis vitiata & corrupta reddita, in duodeni flexura stagnante diutius, ibi cum succo pancreatico confermentata quasi & caustica acri facta, eandem conflare, inde successive ad sanguinem & cerebri spinalisque medullæ membranas ferri, universum nervosarum & vasculosarum partium systema male afficere, febremque efficere, donec demum ad externum corporis ambitum pellatur.

§. XII.

Ad concipiendam hanc erysipelatis materiam, dispositi præ reliquis temperamento sanguinei & sanguineo-cholerici, plethorici, juvenes, viri nec non feminae gravidæ, in quibus tamen benignioris esse solet naturæ. Sed in scorbuticis, senibus & cacochymicis, item feminis suppressione vel emansione, aut retentione mensium laborantibus, deteriore obtinet genium. Crebrius etiam & facili ex causa, eidem obnoxii, qui ex parentibus eodem affectu prognati, & qui semel passi, sæpius postea ipsius experiuntur insultum, præsertim si senes & scorbutici. Anniversaria & æquinoctialia, quin singulis mensibus redeuntia erysipelata, *Magnif. Dn. P RÆSES* notavit. Sed de his, in senibus maxime & cacochymicis, verum etiam deprehendit HIPPOCRATIS in *aphor.* effatam: quod qui sæpe erysipelate corripuntur, tandem eo moriantur.

§. XIII.

Quæ autem hanc intus delitescentem erysipelatis materialem causam evolvere & in actum deducere possunt, ex rebus non naturalibus sunt multa. Inter hæc primum ac præcipuum locum sibi vindicant animi affectus vehementes, ira præsertim ac terror. Inter alia FALLOPIVS consignavit exemplum feminae, quæ, quotiescunque irata, erysipelas nasi incurrit, potu aquæ hordei facile discutiendum. Nos etiam, quid animi pathemata ad inducendum erysipelas faciant, confirmatum habemus notabili exemplo, viri, qui primum ex terrore propter incendium subito obortum inflammationem erysipelaceam in tibia dextra incurrit, quæ, quum cachecticum simul esset corpus, exulcerata, demum tamen fere coire visa est. Sed quum interea ira commoveretur vehementius, denuo cum horrore ipsum incescit tumor erysipelaceus in femore, qui pariter pus contraxit, fistulas in musculis sibi efformavit, multoque labore vix est consolidatus.

§. XIV.

Excludit dein erysipelas aër nimis calidus & intensior solis ardor, nec non vicissim subita & vehemens corporis vel pedum refrigeratio. Idem facit cibus calidus, potus exæstuans, crebra ebrietas, nec non balneum fervidius. Inprimis vero ad exclusionem hujus mali faciunt, evacuationes sanguinis, tam artificiales, per scarificationes & venarum sectiones, omissæ, quam spontaneæ per nares, uterum & sedis venas, interceptæ. Speciatim capitis erysipelas frequentius accidit his, qui diu noctuque in aëre humido & pluvioso degunt, item senibus. In mammis solenne est puerperis, præsertim lactan-

lactantibus, post gravem terrorem, tumque illico sistitur lactis effluxus, mammæ duræ fiant & a lacte coagulato tumescunt.

§. XV.

Interim erysipelas, si cito & sine adeo vehementi commotione erumpit, nec corpus sordidum, nec locus nobilior, aut cum nervosis partibus communicans, non tantopere periculofum, sed sub auctiori perspiratione, adhibitis congruis remediis, post unum aut alterum diem, tumor sensim subsidet, ardor ac dolor evanescit, calor roseus mutatur in flavum, cuticula finditur, in squamas fatiscens secedit & morbus ex voto solvitur. Quin salubritatis plane notam quandoque fert, ac novi, alios morbos, præsertim asthma convulsivum, nec non colicam convulsivam, erysipelate superveniente, fuisse feliciter superatos.

§. XVI.

Sed ubi erysipelas magnum, profundum, succi corporis eminentius impuri, pars exquisitioris sensus; periculo, uti supra passim dictum, non vacat. Aut enim rubor livorem & nigredinem induit, ac brevi in sphacelum transit funestum; aut inflammatio discuti renuit, suppuratur ac ulcera mali moris, fistulas ac gangranam inducit. Minimum in sanguineo phlegmaticis & cacochymicis post erysipelas remanet ingens tumor pedis, ut tibia magnitudine tripla naturalem statum excedat isque tumor difficulter abigitur. Qui autem hoc morbo moriuntur, febre pereunt, quæ ut plurimum juncta est cum difficillima respiratione, interdum cum delirio, aliquando cum sopore, & intra septimum plerumque diem, catastrophe accidit lethalis.


§. XVII.

§. XVII.

Male etiam cedit, quod perversa medicatione excipitur. Nam priscum & verum HIPPOCRATIS *aph. 25. Sect. VI.* est dictum: quod si retropellatur, sit perniciosum, quin funestum. Norunt certe uberius omnes qui Medicinam exercent, quam gravia sæpe per repulsionem & retentionem erysipelatis, ab imperitis Medicis maximeque domesticis experimentis, inducantur damna. Nos quidem vidimus post vomitorium & validum purgans recessisse erysipelas, insequutam ventriculi inflammationem & mortem. A venæ sectione etiam ad interiora revocatum esse & vagum postea cum longe majori incommodo factum fuisse notavimus. Observavimus quoque, repulso ab ipsa camphora cum minio & bolo cruris erysipelate, excepisse febrem intensam, stomachi dolorem intolerandum, respirationem mire laboriosam, vomitum biliosum, virium languorem appetitusque prostrationem, nec prius conquievisse hæc pathemata, quam datis antispasmodicis leniterque diaphoreticis & revocato ad pristinam sedem per vesicatorium erysipelate.

§. XIX

De capitis erysipelate, repellentibus, frigidis, adstringentibus, vel etiam nimis spirituosis, nec non camphoratis linimentis tractato, compertum habemus, quod induxerit vertiginem, affectus soporosos, anginam, phrenitidem, linguæ paralyfin, quæ mala senioribus & scorbuticis haud raro fuerunt funesta. Eandem noxam passim testantur Medicorum observata. Ex erysipelate tibiæ epithemate adstringente frigide admoto, repulso, die undecimo mortem accidisse, inventis post mortem pulmonibus



nibus & cerebri membranis pustulis imiliaribus obsessis, mirum foetentibus, fidem facit BONETVS *in anatom. pract. lib. I. Sect. VI. Obs. II.* Feminam, post applicatam aquam frigidum, horrendum delirium & miserrimam mortem esse expertam, testis est, HAGEDORN *Cent. I. obs. XXXIIX.* Et erysipelas, solo aëre frigido repulsum, vertiginem & impotentiam lateris induxisse, memorat SALMVTH *Cent. II. obs. XLIII.*

§. XIX.

Neque minus saturnina, oleosa, linimenta spirituo-
sa, largiter comphorata exterius admota, malum erysi-
pelatis eventum procurant, ac ut in ulcera mali moris,
gangrænam & sphacelum, degeneret, faciunt, uti plu-
ribus MOENICHEN *obs. II. pag. 245.* item TIMAE-
VS a GULDENFLEE *lib. VI. cas. XXXIII.* testantur. Specia-
tim HILDANVS de erysipelate manus oleo rosaceo
ex consilio imperiti Chirurgi inuncto, gangrænam vix
sanabilem accidisse memorat. *Cent. II. obs. 82.* Erysipelas
etiam cruris oedematofum lavamento spirituofo subla-
tum, febrem interfam, laboriosam respirationem, into-
lerabilem stomachi dolorem & vomitum biliosum indu-
xisse, eademque omnia revocato in tibias per vesicato-
rium erysipelate disparuisse, relatum legimus in M. N. C.
Cent. VI. pag. 107.

§. XX.

Hic est decursus & hæ sunt causæ erysipelatis atque
tam gravia etiam ex præpostera medicatione damna re-
dundant. Opera igitur danda, ut congrua remedia
causæ morbi opposita recta methodo adhibeantur. Jam
omnia erysipelati medendi ratio tribus his absolvitur
indicationibus: I. ut motus iste febrilis naturæ nullo mo-
do

do impediatur, sed potius si deficit, promoveatur, si ex-
cedit ad temperamentum reducatur II. Ut materia subti-
tilis caustica nervosis partibus insidens temperetur atque
ad se & excretionem præparetur. III. Ut stasis lymphæ
putridæ & causticæ inflammatoria in partibus externis dis-
curiatur & ad perfectam expulsionem traducatur.

§. XXI.

Inter ea præsidia, quæ motum febrilem naturæ quo-
dammodo languentem excitant & promovent, ex classi-
cis remediis laudem omnino meretur mixtura simplex,
quando cum spiritu nitri dulci, aut melius adhuc, li-
quore nostro anodyno minerali, miscetur; vel si essen-
tia scordii, aut pimpinellæ albæ, non adeo spirituosæ &
concentratæ, cum tantundem liquoris anodyni nostri
confunditur, & ad XX. vel XXX. guttas, porrigitur. Ju-
vat quoque expulsionem infusum theiforme, ex herba
scordii, floribus sambuci & semine fœniculi compositum,
nec non ex temperatioribus pulvis bezoardicus noster,
aut Ludovicianus. Motus spasmosque excedentes mo-
deratur emulsio ex aqua fl. sambuci, tiliæ, acaciæ cum
seminibus quatuor frigidis majoribus, nec non semine na-
pi, præsertim si loco vehiculi usurpetur, cum quo pulvis
noster bezoardicus, vel solus, vel cum aliquot nitri & cin-
naboris granis, assumatur. Idem facit simulatque expul-
sionem sustinet, mixtura ex una spiritus bezoardici Buffii
& tribus liquores nostri anodyni partibus. Vbi vero
motus legitimi, nec nimii, nec deficientes præsto, utilis-
simum omnino domesticum illud remedium, ex rob sam-
buci uncia, cornu cervi usti, aut lapidum cancrorum
drachma ex aqua florum sambuci sumtum, cui ego in
calidioribus cum fructu adjicere soleo X. vel XII. nitri
puri grana.

§. XXII.

Ad demulcendam humorum acrimoniam materi-
amque recte præparandam, præter jam dicta, spectata
sunt virtutis decocta, loco potus ordinarii sumta, ex
rasura cornu cervi, radice scorzonerae, althææ, liquiritiæ
& chinæ, cum semine fœniculi, item decoctum avena-
ceum.

§. XXIII.

Discussio staseos inflammatoriæ per externa juvanda.
Laudantur hunc in finem varia ab auctoribus. LOS-
SIVS *lib. I. obs. 25.* commendat epithema ex decocto flo-
rum sambuci cum vino, sapone Veneto & theriaca.
BARTHOLINVS *Cent. VI.* nec non CRATO &
ANGELVS SALA lithargyrium inter duas petias te-
pide apponendum. LVDOVICI *in opp. pag. 448.*
pulverem ex cerussa, myrrha & farina. Sed quam fa-
cile externis erysipelas repellatur & damnum procure-
tur, supra jam dictum & inferius adhuc dicetur. Hinc
summa in eorum usu opus est cautione. Vsitatissimus
pulvis erysipelatodes MYNSICHTI, ex farina vola-
tili, plumbo usto, bolo rubra, mastiche, olibano &
cerussa. Cujus in locum commode ac tutius surrogatur
pulvis extemporaneus ex floribus sambuci & radice li-
quiritiæ, sub temperato calore lecti & hypocausi, su-
binde inspersus, vel sacculus ex his & floribus chamo-
millæ utriusque, meliloti, tepide admotus.

§. XXIV.

Accedat vero necesse est congruum regimen. Nam
perpetua in practicis est regula: In acutis & exanthe-
maticis febribus, corpus semper in blanda & continua
diaphoresi esse servandum, quo sanguinis æqualis ad su-
per-

perficiem corporis fiat & maneat motus, ac cum hoc excrementitia materia jugiter advecta diffletur. Hinc merito etiam idem in erysipelate tenendum, cum quoad totum corpus, tum maxime quoad partem affectam, quo dolores mitigantur & discussio egregie promovetur.

§. XXV.

His occurrendum præsidiiis erysipelati; jam non abs re erit, utilissimas quasdam adjicere cautiones, in medicatione solícite tenendas. Harum potissima circa externorum usum versatur, ne iisdem vel repellatur, vel in ulcus convertatur erysipelas. Jam quidem inter omnes uberius constat de noxa ex actu frigidis & unctuosus, nec non ex adstringentibus, terreis & humidis. Sed, qui nostro tempore quam maxime taxandus, abusus camphoratorum. Pessimus enim passim invaluit mos, partem erysipelate affectam sæpius inungere & fovere spiritu vini camphorato, modo cum, modo sine croco. Tantum autem abest, ut hoc discutiatur erysipelas, ut potius fibræ nimium fiant rigidæ, tenue exhalet, crassius magis impingatur tandemque vel torpor partis, vel ulcera fistulosa inducantur. Nos certe multa sinistri effectus novimus exempla. Vidimus in virgine mensium suppressione laborante & post terrorem erysipelate capitis affecta, tam male cessisse litum crebriorem cum spiritu vini camphorato, suasu Medici institutum, ut non modo supra tempora exulceratio fieret, sed & vel decem fistulosi ductus per calvariam, frontem, genas, ad collum usque excurrentes, emergerent, cum exquisitis doloribus, maxillæ inferioris immobilitate corporisque tabe, donec tandem a scito peritiori Medico-Chirurgo, ulcera ad consolidationem, non sine magno labore & vix intra tres menses, perduce-

ducerentur. Quin quum; cujusque fere corporis peculiaris sit idiosyncrasia, siue specifica quædam & induvidualis sensibilitas, quæ quam maxime in cute, ceu parte nervosa, viget; hanc etiam ob causam in vitiis cutis eo majori cum circumspeditione topica admovenda, quia non omnia fert. omnis. Observavimus enim sapissime in mammarum erysipelate admoto innoxio & in aliis vel centies probato emplastro, brevi tempore auctam potius fuisse cum dolore inflammationem, quæ remoto emplastro illico remisit.

§. XXVI.

Quod si, adhibitis licet efficacibus internis & externis discutientibus, erysipelaceus tumor tamen manet, rubor livescere incipit, dolor profundius hæret & ad periosmium pertingere videtur, ad ulcerationem tendit erysipelas. Tum igitur transeundum ad ea quæ suppurationem promovent; ita tamen, ut simul corruptioni putredinosæ occurratur. Hunc in finem utilissimum emplastrum diachylon simplex rite confectum, adjecta sufficienti quantitate camphoræ & croci; vel etiam emplastrum Barbette saturninum saponatum, superpositis epithematibus balsamicis, quæ corruptionem arcent. Quando his pus contractum & profundius hæret, aperiendus tumor lancetta, & pus successive, non simul & semel, evocandum. Ne autem in glandulosis maxime locis abscessus in fistulosa & mali moris ulcera transeat, post materiæ secessionem, injiciendus liquor balsamicus ex tinctura florum hyperici, essentia balsami Peruviani, myrrha electa & aliquot guttulis spiritus terebinthinæ.

§. XXVII.

Quando erysipelas nimis profundum & magnum sphacelum,

celum, ex colore in bruno rubicundum vergente & symptomatum post expulsionem perduratione, cognoscendum, minatur, præter interna inflammationi & putredini resistentia, nitrum maxime cum momento camphoræ, externe spirituosæ & roborantia, conficienda ex aqua calcis vivæ, spiritu vini camphorato, aceto vini, cum lithargyrio, admixta quoque essentia scordii & myrrhæ, crebrius calide cum linteis duplicatis applicanda.

§. XXIIIX.

Sanguinis missio in erysipelate quandoque noxia, quandoque utilis. Ne igitur delinquat artifex, tenendum: si invadit erysipelacea febris plethoricos, potibus spirituosiss affvetos, primis statim diebus vena in brachio pertundenda, Sic enim liberior fit sanguinis progressus & expulsio materiæ ad cutem promovetur. Tanto vero magis id utile est, si caput petit erysipelas, tumque gravia hoc auxilio præscinduntur symptomata. Consultum quoque est interdum loco venæsectionis, cucurbitulis cum scarificatione in cervice uti. Semper tamen post sanguinis subtractionem curandum, ut expeditus & æqualis maneat perspirationis successus.

§. XXIX.

In erysipelate scorbutico, quod diu detinet, in usum vocanda sanguinem depurantia & leniter laxantia, cum diaphoreticis; ita quidem, ut per aliquot dies alvina regio expurgetur, dein per aliquot tempus subjungantur diuretica ac diaphoretica, idque alternatim aliquoties repetatur, simulque pro potu ordinario decoctum temperans ex lignis & radicibus mucilaginosiss cum amaris, præsertim cum radice cichorei, taraxaci, & passulis, bibatur. Novit in Westphalia *Magnif. Dn. PRAESES* virum generosum

rosum, contumaci scorbutico erysipelate ter fere quotannis circa malleolum laborantem, cui cum fructu suavit, ut fonticulum inuri permetteret inter genu & malleolum, acidulis Antonianis uteretur, pedem tumidum ac debilem fascia spiritu vini madida arctius ligaret & præterea a crassiori victu abstineret & mane juscula cum radice cichorei, apii & scorzonæræ confecta, sorbillaret.

§. XXX.

Quod sæpe recurrit erysipelas, non sine periculo est. Hinc eo annitendum Medico, ut corpus ab hoc malo vindicet. SENNERTVS *de febb. lib. II. cap. XVI.* laudat placentulas ex comis absynthii, herba taraxaci & chamædryos, per mensem Majum omni mane sumendas, nec non lac cui flores sambuci incoctæ, decresciente luna, ter vel quater, mane hauriendum. BARTHOLINVS *Cent. VI. hist. LXXXII.* meminit experimenti in Dania probatissimi, quo urinam propriam melle subactam, summo mane continuis tribus diebus assumunt, & exinde rutos se per vitam ab erysipelate sciunt. Alii, quibus plethora sola fere morborum causa, in sanguinis missione spem ponunt omnem. Nos autem nil efficacius deprehendimus, quam debitum, sub congruo regimine & victu, præparato prius sive per laxantia, sive sanguinis missionem corpore, institutum aquarum mineralium usum, internum æque ac externum, eoque nomine præ reliquis laudem merentur acidulæ Egranæ, thermæ Emsenses, nec non Carolinæ mitiores. His autem deficientibus, venæsectio, vere & autumno præsertim, purgationes per epicrasin, & ea, quæ sanguini repurgando serviunt, cum exacto in vita victuque moderamine, operam locant commodissimam.

F I N I S.